




Minggu, 18 Oktober 2020

Ogen: Matius 24:36-44



Erjaga-jagalah Ise Pe La Metehsa



Ope lenga lit pandemi virus Corona, dahin pelayanen i bas runggun lit gelarna erjaga-jaga. Biasana e ilakoken tupung lit perpulungen si enggo ngadap man Tuhan, janah wari pepagina maka ikuburken. Tupung berngi ope lenga ikuburken ibahan acara erjaga-jaga, i je lit kebaktin ras nehken kata pengapul. Kenca dung nehken kata pengapul piga-piga jam nari perpulungen i je nemani keluarga si paksana erceda ate. Ilakoken i je rende-rende lagu KEE GBKP entah pe lagu rohani. Alu tujun megegeh keluarga ngalaken kearun atena, janah tetap pe ia erpengarapen man Dibata si mada kegeluhen.

Wari enda kita isuruh erjaga-jaga, labo njagai kiniteken perpulungen saja tapi pe njagai kinitekenta pribadi gelah tetap paguh nimai kerehen Tuhan Jesus mulihken ku doni enda. Erjaga-jaga e ngatakensa ersikap katawari paksa pe, sabap ise pe la metehsa ndigan Tuhan Jesus e reh mulihken ku doni enda. KerehenenNa e iumpamaken bagi kai si jadi i bas paksa Nuah nai. Ope denga reh lau mbelin kerina kalak si nggeluh paksa si e man dengen minem, sereh dengen empo seh ku wari Nuah bengket ku bas perahu. Sitik pe la ietehna kai si nandangi jadi man bana ope denga reh lau mbelin si erbahansa ia mombak kerina. Si idah i je maka si patuh man Dibata terkelin, tapi si la patuh kernep i bas lau si mbelin e.

Perlu si idah i je kerna kepatuhen erkiniteken. La erngadi-ngadi, sabap la si eteh katawari Tuhan Jesus e reh. Bagi ituriken i bas ay. 40 ras 41; lit dua kalak dilaki erdahin i juma, sekalak pagi ibuat, sekalak nari itadingken, dua kalak diberu sangana nutu, sekalak pagi ibuat sekalak nari itadingken, ertina i bas kerina paksa ras situasi Tuhan Jesus banci reh ndahi kita. Erkiteken sie perlu kal kita lalap ersikap, jagalah maka ula semenit pe kinitekenta e monce man Dibata.